

**1272-1272- OFP - Acta Capitulum Generalium Florencie Celebrati**

In nomine patris et filii et spiritus sancti. Amen.

Acta capituli generalis Florencie celebrati  
anno Domini · M<sup>o</sup> · CC<sup>o</sup> · LXXII<sup>o</sup> ·

Confirmamus has constituciones. In capitulo de electione prioris provincialis. ubi dicitur. mortuo priore provinciali. vel amoto. prior qui eius locum optinet. etc. deleatur totum usque ibi. transferatur. et dicatur sic. mortuo priore provinciali vel amoto. prior qui eius locum optinet teneatur quam cicius poterit convocare electores. et in die ad eligendum assignata; prior provincialis eligatur vel postuletur et provinciale capitulum celebretur. nisi prius fuerit celebratum. Quod si in die statuta non elegerint vel postulaverint. qui debent eligere. potestas providendi ad magistrum ordinis transferatur. Et hec habet tria capitula.

Item hanc. In capitulo de electione prioris conventualis. ubi dicitur. si ei visum fuerit. confirmetur. deleatur totum quod sequitur. usque ibi conventus autem qui petit. etc. et dicatur sic. idem eiam fit si aliquis a maiori parte illorum. ad quos spectat electio. de alio conventu fuerit postulatus. Et hec habet tria capitula.

Item hanc. In eodem capitulo infra. ubi dicitur. si vero infra mensem non elegerint. addatur. vel postulaverint. Et hec habet tria capitula.

Item hanc. In capitulo de electione prioris provincialis. ubi dicitur. vices eius optineat. addatur. quod si capitulum provinciale ex aliqua causa ad conventum alium transferatur; post translacionem. prioris vicarii potestas expiret. et prior loci illius ad quem capitulum translatum fuerit; vices provincialis optineat. Et hec habet tria capitula.

Item hanc. In capitulo de gravi culpa. ubi dicitur. caveat autem quilibet frater. ne proclamet aliquem de crimine nisi possit probare. deleatur totum et dicatur sic. caveat autem quilibet frater. ne proclamet aliquem in capitulo de crimine eiam de auditu; nisi ipsum crimen possit probare. Et hec habet tria capitula.

Item hanc. In capitulo de visitoribus. ubi dicitur. si aliquis visitor antequam visitet. addatur. vel in ipsa visitacione. et ubi dicitur. in priorem confirmatus fuerit vel mortuus. [addatur]. vel alias impeditus. Et hec habet tria capitula.

Item hanc. In capitulo de rasura. ubi dicitur. quarta inter purificacionem et pascha. addatur. cum vero prolixitas temporis inter purificacionem et pascha exegerit; addatur alia rasura et tunc ille due intermedie fiant partito tempore. Et hec habet tria capitula.

Item hanc. In eodem capitulo. ubi dicitur. · xiiia · in festo sancti Dyonyssii. deleatur totum. usque in finem. et dicatur sic · xiiia · in festo sancti Michaelis · xiiiiia · in festo sancti Luche · xva · in festo · iiiior · coronatorum · xvia · in festo sancti Andree. [Et hec habet tria capitula].

Approbamus hanc. In capitulo de visitoribus. ubi dicitur. generali capitulo studeant denunciare. deleatur. et dicatur sic. magistro et diffinitoribus generalis capituli studeant denunciare. vel priori provinciali et diffinitoribus capituli provincialis. si ibi generale capitulum non fuerit celebrandum. Et hec habet duo capitula.

Item hanc. In capitulo De itinerantibus. in fine addatur. si quis frater ordinis nostri. per se. vel per alium. ordinationem de se. vel de alio fratre factam. vel obedienciam sibi. vel alteri fratri iniunctam. per quamcumque personam extra obedienciam nostri ordinis constitutam. quocumque modo procuraverit revocari. vel in aliqua provincia. seu conventu. aut eiam officio. seu in studio generali poni. vel remanere. vel inde amoveri. vel cum personis extraneis commorari; ipso facto ex vi presentis statuti. omni voce tam in accusacione aliorum. quam in electionibus et tractatibus eorum. que ad capitulum provinciale mittenda sunt. penitus sit privatus. nec ad predicta restitui valeat. nisi per magistrum ordinis; vel diffinitores capituli generalis. Et hec habet · ii · capitula.

Item hanc. In capitulo de capitulo cotidiano. ubi dicitur. similiter quisque caveat. ne malum quod audivit. etc. deleatur totum usque ibi. auditis vero culpis. etc. Et hec habet · ii · capitula.

Item hanc. In capitulo de electione prioris conventualis. post illud. prior provincialis conventui provideat de priore. addatur. si autem prior provincialis aliquem fratrem ab aliquo conventu electum vel postulatum. non confirmaverit; secundo fratrem illum sine illius prioris provincialis licencia eligere. vel postulare non possint. quod si fecerint; potestas providendi de priore. ad priorem provincialem devolvatur. Et hec habet · ii · capitula.

Iste sunt inchoaciones.

Inchoamus has. In capitulo de electione magistri. ubi dicitur. mortuo igitur magistro. etc. totum quod sequitur usque ibi. priores igitur provinciales. etc. deleatur. et dicatur sic. mortuo igitur magistro. vel a magisterio amoto. prior provincialis illius provincie. ubi sequens capitulum fuerit celebrandum. vicem magistri ordinis in omnibus optineat. quousque magister ordinis sit electus. exceptis absolucionibus

priorum provincialium et conventualium aliarum provinciarum. et translacionibus fratrum de una provincia ad aliam. de quibus se nullatenus intromittat. nisi forte aliquis frater non prior provincialis existens. pro provincialatus officio peteretur. Si autem illa provincia tunc priorem provincialem non habuerit. vel infra tempus vicarie sue eum mori. vel amoveri contigerit; prior provincialis illius provincie. ubi immediate precedens capitulum generale fuerat celebratum. vices optineat supradictas. et sic deinceps retrocedendo. donec in aliqua provinciarum isto modo valeat vicarius inveniri.

Item hanc. In capitulo de solempni celebratione capituli. addatur in principio sic. capitulum generale quantum ad auctoritatem diffinitorum. in vigilia penthecostes incipit celebrari. et illud quod in eodem capitulo dicitur circa finem. ea vero etc. usque ibi. capitulum autem. etc. deleatur.

Item hanc. In capitulo de electione prioris provincialis. in fine ubi dicitur. idem autem prior provincialis. etc. deleatur totum usque in finem. et dicatur sic. idem autem prior provincialis. singulis annis totam suam provinciam teneatur per se. vel per suos vicarios visitare.

Item hanc. In capitulo de studentibus. ubi dicitur · iiiior · autem provincie etc. deleatur · iiiior · et dicatur sic · vi · autem provincie. scilicet Hispania. Provincia. Lombardia. Romana provincia. Theutonia. Anglia; provideant. etc.

Item hanc. In ordinario in rubrica diei parasceves. ubi dicitur. discalceati. et ita calcient se. deleatur. Iste sunt admoniciones.

Admonemus. quod in singulis conventibus. singulis septimanis. quando fuerit feria vacans. cantor provideat. ut in conventu una missa de beata virgine celebretur.

Item. Ut fratres omnes. tam priores quam alii. ad dominos prelatos ecclesiarum in verbis et factis; se habeant reverenter.

Item. Quod constitutio de recipiendis noviciis arcus observetur. et in etate sine causa legitima nullatenus dispensetur. quod si aliqui de cetero aliquem infra legitimam etatem receperint contra iura. vel tali receptioni consenserint cum effectu; magister ordinis cum voluntate et ordinatione diffinitorum. privat eos vocibus suis in receptione noviciorum. quousque per magistrum vel per priorem suum provincialem et diffinitores capituli provincialis fuerint restituti.

Iniungimus autem omnibus prioribus conventualibus. ut modis omnibus provideant et procurent habere omnes indulgencias et privilegia bullata ad ordinem pertinentia in communi. vel saltem eorum transcripta sigillis authenticis sigillata. vel per manum publicam roborata.

Item. Iniungimus omnibus prioribus provincialibus et conventualibus. quod constitutionem de pecunia non portanda. et admoniciones factas de pecunia nisi pro certis usibus. et hoc usque ad certa tempora non tenenda. diligenter faciant observari. et transgressores. si quos invenerint. severe puniant. ut merentur.

Item. Districte iniungimus omnibus prioribus provincialibus et diffinitoribus capitulorum provincialium instancium. ut modum aliquem ordinent. per quem fratrum discursus sollicitus arceatur. et illam ordinationem strictissime faciant observari. et ipsam ordinationem. quam super hoc fecerint. scribant magistro ad sequens capitulum generale.

Districte insuper inhibemus. ne aliquis frater prelati vel vicarius aut quicumque alius. directe vel indirecte audeat impedire. ne fratres libere scribant. quod voluerint magistro et diffinitoribus capituli generalis.

Ordinationem studii Parisiensis et aliorum generalium studiorum quoad principales lectores et eciam baccalarios; committimus magistro ordinis.

Magister ordinis de voluntate et consilio diffinitorum. dat licenciam singulis prioribus provincialibus. quod de consilio et assensu diffinitorum capituli provincialis possint mittere singulos fratres ad curiam Romanam. proviso quod illi qui mittentur. sint homines bene morigerati. et ordinis zelatores. et industrii. atque apti ad negocia ordinis in curia cum procuratore ordinis pertractanda. et semper sint in illo conventu. ubi contigerit curiam commorari. et expresse prohibet.

ne aliquis frater ulterius vadat. vel mittat aliquem fratrem ad curiam preter illos; sine magistro ordinis licencia speciali.

Ista sunt suffragia.

Pro domino papa et statu universalis ecclesie; quilibet sacerdos · iii · missas. Pro domino Anibaldo cardinali quilibet sacerdos · i · missam de beata virgine.<sup>1</sup>

Pro domino Hostiensi defuncto. qui habebat litteras a magistro ordinis. quod fieret pro eo sicut pro magistro ordinis<sup>2</sup> quilibet sacerdos · iii · missas. etc. Pro qualibet missa superius posita; clericus non sacerdos · vii · psalmos cum letania. et conversi · c · pater noster. et totidem ave Maria dicant.

<sup>1</sup> Scl. fratre Annibaldo de Annibaldeschis seu de Molaria Ord. Praed.; cf. SSOPI, 261.

<sup>2</sup> Scl. Henrico de Bartholomaeis † 1271 oct. 29. EUBEL l.c.p. 8.

Absolvimus priores provinciales. Theutonie. Ungarie. Anglie. Dacie; Grecie. Priores conventuales; Romanum. Barolitanum. Brundusinum. etc. et volumus. quod immediate non possint resumere ad eadem officia in eisdem provinciis et conventibus.

Sententias iudicum approbamus. et iniungimus prioribus provincialibus. quod eas diligenter faciant executioni mandari.

Sequens capitulum generale in conventu Pestensi. in provincia Ungarie assignamus. et diffinitores ita veniant tempestive. ut sint in loco capituli in dominica proximo capitulum precedente.

Actis additae sunt litterae magistri ordinis; cf. app. n. XXIII.